

陳眉公訂正駮鸞錄

宋 石湖范成大 著

明 旃林王體元
子長王錫祚 校

石湖居士以乾道壬辰十二月七日發吳郡帥
廣西泊船姑蘇館十四日出盤門大風雨不行
泊赤門灣十五日發赤門早飯松江送客入隴
庵夜登垂虹霜月滿江船不忍發送者亦忘歸

遂泊橋下十六日發垂虹宿震澤前福州教授
聞人阜民伯卿賀州文學周震震亨皆來會余
去年北征感腹疾於滑州且死復生今惟皮骨
粗存比懷桂林之章再上疏丐外祠以老弗獲
命乃襆被行則從故人李嘉言聖俞致一老成
館客與偕聖俞舉震亨故今日遠來震亨舉業
外尤精瑤瑒千林開諸書試評余五行則曰吾
知之舊矣數語可決公欲遄歸以老抑未也今

南去三千里安坐再暮末年冬中復西南行萬
里亦莽乃歸但此時某恐不及被公飲食教載
之勝耳其言詭異始筆記之十七日至湖州泊
碧澗堂十八日湖守薛季宣士隆開宴方祈雪
蔬食而且張樂十九日將遊北山石林薛守願
同行乘輕舟十餘里登籃輿小憇牛氏歲寒堂
自此入山松桂深幽絕無塵事過大嶺乃至石
林則棟宇已傾頽西廊盡拆去今畦菜矣正堂

無恙亦有舊牀榻在凝塵鼠壤中堂正而下山之高峰層巒空翠照衣袂畧似上天竺白雲堂所見而加雄尊自堂西過二小亭佳石錯立道周至西巖石益竒且多有小堂曰承詔葉公自玉堂歸守先隴經始之初始有此堂後以天官召還受命於此因以爲志焉其旁登高有羅漢巖石狀恠詭皆嵌空裝綴巧過鐫刻自西巖回步至東巖石之高壯礪砢又過西巖小亭亦類

矣葉公好石盡力剔山骨森然發露若林而開徑於石間亦有自石他所移徙置道傍以補闕空者方公著書釋經於堂上四方學士聞風仰之如璇璣景星語石林所在又如仙都道山欲至不可得蓋棺未幾而其家已不能有妾而弃之灌莽叢薄間遊子相與徘徊嘆息之不能去或謂此地離人太遠岑尉荒虛非大官部曲衆多者難久處又云公沒後山鬼搶攘暮夜與人

錯行婦子不能安室故諸郎去之云出石林飯
旌善寺葉氏墳祠也霅川有兩玲瓏山石林焉
大玲瓏又有小玲瓏在長興縣界路口聞其尤
勝石林遂過之小玲瓏今屬沈氏沈氏之父死二子
幼方檢校於官此山石色微黃而更奇古

至洞穴十數皆旁相通貫故名玲瓏

中窈如深谷堂前小池石如牛馬虺隤
流出之石磈積嵌巖巧恠萬

狀缺罅清泉泓泓叢桂覆其上亭館既無人居
亦漸荒廢霅川特無好事者能捐厚貲買之沈
氏雖不得仙亦足以豪矣玲瓏山杜牧之所遊
卽石林是小玲瓏晚出而加勝由沈家步登舟
回至城下一鼓後矣二十日發湖州十八里宿
橫山橫山雖小乃截然溪上蔽遮一川若前無
路者相傳爲霅川風水向背之要二十一日發
橫山宿德清縣二十二日泊舟左顧亭訪縣中

知識數家大抵倚山瞰溪易得卜築之勝前戶
部侍郎李公子至之居甚輪奐其兄叅政之子
德甫者居郭外據一丘壑曩歲嘗過之今其人
亡室已虛矣聞運使沈度公雅方考室往觀之
甚潔而庠堂之簷手可接也公雅素傳過庭所
教常有知止易足之說意其規摹出此左顧亭
者孔愉放龜處亭前兩大枯木可千年德清古
物餘不知他今孔侯墓廟在焉廟居墓前與其

夫人像皆盤膝坐蓋是几席未廢時所作龜溪
倚山而薪蒸貴溪而不數得嘉魚以其密邇行
都盡販以往風物已不逮曩年出郊三里遊城
山頃歲赴太學試道病暑三宿晚對軒題詩壁
間故在凡僧寺皆南向此獨反北故夏無涼風
聞自此過武康纔二十五里道間有梅花村以
千萬計客行有程不得住午發德清宿安溪二
十三日宿餘杭縣茗溪館二十四日至二十七

日皆泊於餘杭乳母徐自登舟病喘甚氣息綿
憊若以登陸行則速其絕委之恩義不可過餘
杭五日計無所出昨夕達曉不寐往來方寸中
此其勢必不可以遠行也且政使嫡母有兼侍
而長子遠使亦當就養他子况乳保哉張氏妹
從其夫方宦臨安又同乳于徐者遂決意留之
張氏分路時心目割斷世謂生離不如死別信
然二十八日陸行發餘杭與吳之兄弟妹姪及

親戚遠送者別皆曰君今過嶺入厲土何從數
得安否問此別是非常時比或曰君縱歸恐染
瘴必老且病矣亦有禦瘴藥否其言悲焉泣且
遮道不肯令肩輿遂行又新與老乳母作生死
訣一段凄愴使文通復得夢筆作後賦亦不能
狀也晚宿富陽縣廢寺中卽客館也二十九日
晚復登舟大雪不可行三十日發富陽雪滿千
山江色沉碧但小霽風急寒甚披使虜時所作

馬智金
綿袍戴氈帽坐船頭縱觀不勝清絕剡溪夜汎
景物未必過此除夜行役廟祭及鄉里節物盡
廢晚宿嚴州桐廬縣癸巳歲正月一日巳午間
至釣臺率家人子登臺講元正禮謁三先生祠
登絕頂掃雪坐平石上諸山縞然凍雲不開境
過清矣臧獲亦貪殊景皆忍寒犯滑來登始予
自紹興巳卯歲以新安戶曹公檄來識釣臺題
詩壁間後十年以括蒼假守被召復至自和二

篇及今又四年蓋三過焉復自和三篇薄宦區
區如此豈惟愧羊裘公見篙師灘子慚顏亦厚
乃併刻數字于石廡在間而宿西口二日午至
嚴州泊定州館三日泊嚴州渡江上浮橋遊報
恩寺中有瀟酒軒取吾家文正公瀟酒桐廬郡
之句以名浮橋之禁甚嚴歛浦移排畢集橋下
要而重征之商旅大困有濡滯數月不得過者
余掾歛時頗知其事休寧山中宜杉土人稀作

田多以種杉爲業杉又易生之物故取之難窮
出山時價極賤抵郡城已抽解不貲比及嚴則
所征數有倍嚴之官吏方曰吾州無利孔微歛
杉不爲州矣觀此言則商旅之病何時而瘳蓋
一木出山或不直百錢至浙江乃賣兩千皆重
征與久客費使之四日五日皆泊嚴州六日發
嚴州宿大羊七日至婺州蘭溪縣泊澄江館此
縣舊出名酒漕司扼其坊近年所釀寔不及昔

時大抵甘滯不快聲稱減矣八日泊蘭溪九日
大雨連日小舟踰灣病倦又聞衢之龍游小路
泥深溪漲渡江不如陸乃改陸行取婺州路晚
至婺州泊金華驛十日泊婺州十一日早飯馬
海寺世俗所用百忌曆出此寺宿湯岷十二日
早飯舍利寺宿龍游縣龍丘驛未至有長橋工
料嚴飭他處所未見前令陶定所作自登陸來
所至山有殘雪村落無處無梅客行匆匆自無

緣領畧可嘆也十三日至衢州自婺至衢皆磚街無復泥塗之憂異時兩州各有一富人作姻家欲便往來共蹇此路十四日前吏部尚書汪公聖錫亦自玉山來同赴郡中敷文閣待制張幾仲燈宴是日乃立春曉熿夜蛾同集尊前真良辰也十五日十六日謁公於超化寺之兩山閣留飯與前館職鄭升之公明偕余與公明同召試同除正字校書郎汪公時修國史館中例

序齒公明長余十餘歲復用故事遜公明公明力辭云各已出館正當敘官至逡巡欲遜去汪公拱立無言余從容請之公徐曰應辰舊與凌季文尚書皆爲正字季文年長上坐比歲僕以端明殿學士守平江過湖季文在焉時爲顯謨閣學士同會郡中僕亦用故事避季文季文不辭公明遂就坐記于此以補麟臺後志季文名景夏十七日將發衢州暫遊郡圃登超鑿堂前守

施元之德初所作甚得登眺之勝但恨小偏與木相直若方徙數丈盡對諸山乃佳夜行宿招賢市十八日過常山縣宿蔣連市十九日宿信州玉山縣玉山驛二十日宿沙谿自入常山至此所在多喬木茂林清溪白沙浙西之所乏也二十一日二十三日皆泊信州自此復登舟二十四日舟行宿霍毛渡二十五日過弋陽縣宿漁浦二十六日過貴溪縣宿金沙渡去縣數里

有桃花臺大壇石色如桃花旁入數里有龜山遠望一山特起與他小山接如龜然特起者其首也大抵自上饒溪行南岸綿延皆低石山童無草木色赤似紫或一石長數里不休或有如盤如屏如几及臥牛蹲墓之狀者不可勝計石上平爭可以攤曝麥禾二十七日過饒州安仁縣吏士自信州分路陸行者適方渡水取撫州路會余於南昌之宿港二十八日至餘干縣前

都司趙彥端德莊新居在縣後山上亦占勝同
過思賢寺清音堂下臨琵琶洲一水灣環循縣
郭中一洲前尖長後圓濶如琵琶故以清音名
此堂從昔爲勝處晁無咎書其榜前賢題詩滿
梁壁琵琶洲一名鼈洲野人相傳長沙當旱占
六餘于新漲一洲如鼈遠食茲土潭人信之至
遣人來鑿洲今有斷缺處又云歲澇洲不沒大
甚僅浸琵琶之頃後又謂浮洲餘干之名見前

漢書縣有干越亭二十九日宿鄒公溪閏月一
日宿鄒子口鄒子者鄱陽湖尾也名爲盜區非
便風張帆及有舡伴不可過大雪泊舟龍王廟
二日雪甚風橫禱於龍神午霽發舡鄒子宿范
家池湖中稱某家池者取魚處也隨一家占爲
名道中極荒寒時有沙磧蘆葦彌望或報盜舟
不遠夜遣從卒焚舡傍葦叢作勢以安衆三日
未至南昌二十里泊四日泛江至隆興府泊南

浦亭五日登滕王閣其故基甚侈今但於城上
作大堂耳榷酤又借以賣酒佩玉鳴鸞之罷久
矣其下江面極闊雲濤浩然西山相去既遠遂
不能一至又登南昌樓江月臺郡圃偏仄無可
觀江西帥前右正言龔實之欲取王士元三江
五湖之句以廳事後堂爲襟帶堂余爲書其榜
戲爲識曰襟者金也不三年府公其腰黃乎六
日遊東湖謁孺子亭又過其祠廟轉至詠歸亭

東湖秀而野旁多幽居松桂蒙鬱又過許真君
觀觀鐵柱在東廡一日枯池中有柱出地上高
三尺許其端如槎牙如枯拚怪石狀不知其深
幾何相傳以爲許君鎖怪孽於下且以鎮此方
云漕使前司業劉焯文潛之治所園池亭宏麗
大甚帥府然二使者乃共一圃七日將發南浦
終日雨諸司來集遂留行夜分大雪作燃炬照
江中舞蝶塞空亦奇賞也八日泝清江宿張家

寒九日宿市汶緣岸居人煙火相望有樂郊氣
象十日宿上江兩日來帶江悉是楠林翠樾照
水行終日不絕林中竹籬瓦屋不類村墟疑皆
得種橘之利江陵千本古比封君此固不足怪
也十一日過豐城縣小艤寶氣亭聞舊縣去北
尚四十里劍池鄉張雷廟前有小池云掘劍處
也又嘗從治其南名故縣今三徙至此泐江石
堤甚牢密如錢塘不如是卽頽齧不可保聚宿

木湖灘十二日風駛盡帆力舟如飛宿臨江軍
初議詣宜春出陸至此則江道漸淺大艘不可
進遂泊夜大風急雪頃刻積盈尺蓬窻搖蕩震
壓終夕危坐以須其定十三日登富壽堂城西
有富壽岡盤繞郡治以此爲形勝因以名堂登
清江臺前眺江流練練如橫一帶閣阜玉筍諸
山江外殘雪未盡縈青繚白遠目增明十四日
將登陸家屬已行獨冒微雨遊彌林及盤園躡

林故戶部侍郎向公伯恭所作本負郭平地舊亦人家阡隴故多古木修篁廳事及薌林堂皆爲樾蔭所迨森然以寒宅傍入園中步步可觀梅臺最有思致叢植大梅中爲小臺四面有澀道梅皆交枝覆之蓋自梅洞中躡級而登則又下臨花頂盡賞梅之致矣企疎堂之側海棠一徑列植如槿籬位置甚嘉其他處所自有圖本行於世不暇悉紀沒後諸子復葺牆後園池舉

芳諸亭亦不草草大率無水僅有一派入園作小池及澗泉之類所謂虎文者亦不能詳攷出薌林對門又有荒園甚廣未及葺中有古岩桂大數圍江鄉無雙者伯恭欲爲堂亦不果雨終日廉纖假籃輿以枝爲底上起四柱籃缺其前以垂足於空虛有雨雪則以僧笠覆其上兩夫荷之盤園者前湖南倅任詔子巖所居去薌林里許其始酒家之後有古梅盤結如蓋可覆一

欽枝四垂以木架之如坐大酴醾下子巖以爲
天尤物未買得之時薌林尚無恙亦極歎賞勸
子巖作凌雲閣以瞰之迄今方能鳩工梅後坡
壠昫昫子巖悉進築焉地廣過薌林種植大盛
桂徑梅坡極其繁蕪但亦乏水當窪下處作池
積雨水而已周旋兩園遂以抵莫炬炳追及前
頓宿倒塔舖始余得吳中石湖遂習隱焉未能
經營如意也翰林周公子充同其兄必達予上

過之題其壁曰登臨之勝甲於東南余愧駭曰
公言重何乃輕許與如此子充曰吾行四方見
園池多矣始薌林盤園尚乏此天趣非甲而何
子上從旁贊之余非敢以石湖夸憶子充之言
併記于此噫使予有伯恭之力子巖之才又得
閒數年則石湖真當不在薌林盤園下耶十五
日過棲桐山遊玉虛觀擷仙茅作湯舊記晉有
王長史居此地許旌陽旣仙過其家飛白茅數

葉與之曰此茅備五味服之度五世乃以其居
爲觀入蕭史洞隱去以餘茅植山後道士間採
得之極芳辛以煮湯飲尤郁烈徙植他所無復
香味與凡茅等余親驗之疑自是一種香草也
觀中有飛茅殿仙茅碑南唐中書舍人江文蔚
嘗爲修觀碑大中祥符中再修以純綠塗飾至
今色可摘也魏國張忠獻公嘗宿此夢與君談
養生有石刻志之宿萬安驛十六日宿新喻縣

十七日宿袁州分宜縣十八日至袁州桂林師
前大理寺丞 浩德遠先在此相候欲講交承
禮爲留三日泊報恩光孝寺十九日二十日二
十一日二十二日皆泊袁州聞仰山之勝久矣
去城雖遠今日特往遊之二十五里先至孚忠
廟棟宇之盛與祠山張王廟相埒祠兄弟二王
不血食其神龍也舊傳二龍昔居仰山中以其
地施仰山祖師遷居於此江湖諸郡皆春秋來

祭奉之甚嚴廟有楊氏稱吳時加封司徒竹冊
尚存文稱寶大元年余向居鄉得吳江村寺石
幢所記亦以寶大紀年蓋錢氏有浙時或曾用
楊氏正朔此二證爲甚確也二王靈跡有感化
錄一篇著之甚詳此略之桂林迓吏自言梧州
亦有此廟問何以然則曰前師中書舍人張安
國赴鎮適湖南賊李金方作亂廣西岌岌張過
遠禱於二王如西廣不被兵當於桂林爲神立

行廟云出廟三十里至仰山緣山腹喬松之磴
甚危嶺阪上皆禾田層層而上至頂各梯田建
寺之祖仰山師者事具傳燈錄中號小釋迦始
入山求地一獼前引今有獼經橋至谷中卽二
龍所居化爲白衣遜其地焉大仰之名遂聞天
下二龍故蹟有大池上有顏淵亭別有一泓名
叔季泉酌以澹茗自小釋迦塔後方竹滿山取
以爲杖爲世所珍登寺樓以望四山各有佳峯

每峯如一蓮華之葉如是數十峰周遭遶寺山中目其形勝爲蓮華盆晚出山復入袁州二十四日發袁州宿宣風市二十五日宿七里舖自離宜春連日大雨道上淖泥之漿如油不知何人治道乃亂寘塊石皆刊面堅滑輿夫行泥中則漿深洎没行石上則不可著脚趾步艱棘不勝其勞二十六日宿萍鄉縣泊萍實驛人以此地爲楚王得萍實之地然去大江遠非是二十

七日二十八日皆泊萍鄉咽痛徑程以求醫二十九日發萍鄉宿裏田驛三十日宿潭州醴陵縣數日行江西道中林薄逼塞蹊徑歎側比登一小嶺忽出山豁然彌望平蕪蒼然別是一出陸蓋已是湖南界矣縣前淥水橋下小江本名漉水比年新作橋改今名江色黛綠可愛流而川於瀟湘驛屋最雄勝冠江湖間縣出方響鐵工冢比屋琅然其法以歲久鑄鐵爲勝常以善

價買之甚破碎者亦入用二月一日宿山陽驛
夾道皆松木甚茂大抵入湖湘松身皆直如杉
江則栢亦峭直葉如瓔珞二物與吳中迥不
同吳中松多虬幹栢則怪踞二日宿儲洲市又
當捨輿泝江此地既爲舟車更易之衝客旅之
所盤泊故交易甚夥敵壯縣三日始泛湘江自
此至六日早莫行倦則少休不復問地名湘江
岸小山坡陀其來無窮亦不間斷又皆土山路

無峰巒秀麗之意但荒涼相屬耳七日宿衡山
縣西望嶽山岩堯半空湘中山既皆岡阜迄邇
至嶽山乃獨雄尊特起若衆山遜其高寒者八
日入南嶽半道憩食夾路古松三十里至嶽市
宿衡嶽寺嶽市者環皆市區江浙川廣種貨之
所聚生人所須無不有旣憧憧往來則汗穢喧
雜盜賊亡命多隱其間或期會結約於此官置
巡檢司焉九日上謁南嶽廟四阿各有角樓兩

庶土偶仗衛皆取則帝所正殿獨一神座監廟
與禮直官日上香火後殿乃與后並處湖南馬
氏所植古松滿庭殿後東西北三廊壁畫後宮
武洞清所作紹興二十五年火發殿上燒後廊
壁本不圯官不時覆護漸爲風雨所壞帥司亟
遣衆工模搨新廟成用模本更畫雖不復武氏
筆法然位置意象十存七八自宴樂偃戲琴奕
圖書弋釣紉織下至搗練汲井凡宮中四時行

樂作務粲然畢陳良工運思苦心有如此者朶
殿又畫嬪御上直奩香篝衣之事尤爲精妍廟
吏常鑄後宮門非命官盛服毋得入前廊及中
門所畫文武官班旌旗戈甲之屬則常筆也衡
嶽寺在前西集賢峰下有善果尊者鐵錫存焉
孟氏有蜀特來施此寺藏經其簾褰則蜀人戶
部侍郎歐陽彬所施織文妙絕勝業寺在廟前
登御書閣以望嶽晚晴衆山雲盡捲石廩紫蓋

身經錄
三
峒嶽諸峰畢見惟祝融在雲氣中嶽廟正直紫
蓋峰下一小山曰赤帝峰南臺寺在瑞應峰上
登山之最近者勝業寺有隋栢盤踞於地幾一
畝甚怪竒柳子厚般舟和尚碑子厚自書亦有
楷法余病寒不能風雨可登山遂還十日行舟
數里卽再見南嶽峰嵒敦可尊而仰帶江別有
小山一重山民幽居點綴上桃李花方發望之
如臨臯道中盧仝詩湘江兩岸花木深至此方

有句中意十一日早莫行湘中十二日至衡州
十三日十四日泊衡州謁石鼓書院實州治也
始諸郡未命教時天下有書院四徂徠金山岳
瀧石鼓山名也州地行岡隴將盡忽山右一峰
起如大磯浸江中蒸水自邵陽來繞其左瀟湘
自桂零陵來繞其右而皆會於合江亭之前併
爲一水以東去石鼓雄踞要會大略如春秋霸
王號令諸侯勤王蒸湘如兄弟國奔命來會稟

命載書乃同軌以朝宗蓋其形勝如此合江亭
見韓文公詩今名綠淨閣亦取文公詩中綠淨不
可唾之句退之貶潮陽時蓋自此橫絕取路以
入廣東故衡陽之南皆無詩焉西廊外石磴緣
山謂之西溪有窪尊及唐李吉甫齊映諸人題
刻書院之前有諸葛武侯新廟家兄至先爲常
平使者時所立十五日捨舟從陸登回鴈峰郡
南一小山也世傳陽鳥不過衡山至此而回然

聞桂林尚有鴈聲又云此峰預南嶽七十二峰
之數然相去已遠矣小憇花藥寺又行二十里
宿十六日十七日行衡永間路中皆小丘阜道
徑粗惡非堅撥卽亂石砌處又泥淖雖好晴旬
餘猶未乾跬步防躓吏卒呻吟相聞大抵湘中
率不治道又逆旅漿家皆不設圍溷行客苦之
自吳至桂三千里除水行外餘舟車所通皆天
坦無大山惟此有黃巖嶺極高峻回複半日方

度與括之馮公歛之五嶺相若宿大營十八日宿永州祁陽縣始有夷途役夫至相賀新出一種板襍疊數重每重青白異色因加人工爲山水雲氣之屏市賈甚多十九日發祁陽里渡浯溪浯溪者近山石礪也噴薄有聲流出江中上有浯溪橋臨江石崖數壁纔高尋丈中興頌在最大一壁碑之上餘石無幾所謂石崖夫齊者說者謂或是天然整齊之義碑傍巖石皆唐以

來名士題名無間隙外有小丘曰嶧臺小亭曰唐亭與溪而三是爲三吾皆元子之撰也別有一臺祠次山與顏魯公橋上僧舍卽漫郎宅黃魯直書其榜曰浯溪禪寺又書法堂字皆崎側不用工又有陶定書中宮寺榜寺旣不葺諸榜皆委棄壁下竊計次山上隱時偶見江濱有此叢石流泉帶之遂定居景物不出數畝湘流至崖下尤沈碧助成勝致焉打碑賣者一民家自

言爲次山後擅其利過浯溪皆荒山岡阪複重宿東青驛始余讀中興頌又聞諸搢紳先生之論以爲元子之文有春秋法謂如天子幸蜀太子卽位於靈武書法甚嚴又如古者盛德大業必見于歌頌若今歌頌大業非老於文學其誰宜爲則不及盛德又如二聖重歡之語皆微詞見意夫元子之文固不爲無微意矣而後來各人貪作議論復從旁發明呈露之魯直詩至謂

撫軍監國太子事何乃趣取大物爲又云臣結春秋二三策臣甫杜鵬再拜詩安知臣忠痛至骨後世但賞瓊琚詞魯直旣倡此論繼作者靡然從之不復問歌頌中興但以詆罵肅宗爲談柄至張安國極矣曰樓前下馬作奇崇中興之功不當罪豈有臣子方頌中興而傍人遽暴其君之罪於體安乎夫頌者美盛德之形容以成功告於神明者也別無他意非若風雅之有變

也商周魯三詩可以槩見今元子乃以筆削之法寓之聲詩婉詞含譏蓋之而章使真有意邪固已非是諸公謀其傍又如此則中興之碑乃一罪案何頌之有觀魯直二三策與痛至骨之語則誠謂元子有識焉余以爲是非善惡自有史冊歌頌之體不當含譏譬如上壽父母之前捧觴善頌而已若父母有關遺非奉觴時可及磨崖頌大業豈非奉觴時邪元子旣不能無悞

而諸人又從傍詆訶之不恕何異執兵以詬人之父母於其子孫爲壽之時者乎烏得爲事體之正余不佞題五十六字於溪上如欲正君臣父子之大綱與夫頌詩形容之本旨亦不暇爲元子及諸詞人地也詩旣出零陵人大以爲妄謂余不合點破渠鄉曲古蹟有閩人施一靈者通判州事助之譟獨教授王阮南卿是余言則併指南卿以爲黨云二十日行群山間時有青

石如雕鏤者叢臥道傍蓋入零陵界焉晚宿永州泊光華館郡治在山坡上山骨多奇石登新堂及萬石亭皆柳子厚之舊新堂之後群石滿地或臥或立沼水浸碧荷亂生石間萬石堂在高坡乃無一石恐非其故處然前望衆山回合如海登覽甚富子城脚有蒼石崖圍一小亭又有瀟湘樓下臨瀟水不葺二十二日渡瀟水卽至愚溪亦一澗泉瀉出江中官路循溪而上碧

流淙澹石瀨淺澀不可杭春漲時或可所謂舟行若窮忽又無際者必是泚一葉舟耳溪上愚亭以祠子厚路傍有鈿鈿潭鈿鈿熨斗也潭狀似之其地如大小石渠石礮之類詢之皆蕪沒篁竹中無能的知其處者二十三日行山開宿深溪柱之門接牙隊例至於此二十四日宿全州泊至湘館二十五日入湘山寺有無量壽佛塔塔中祖僧之像號稱真身有所著書十餘卷

土人奉之惟謹亦多靈響之說出山遵湘水崖壁行石磴上清流如箭境清而麗佳處名盤石山有泉自洞罅中噴出當道名玉髓泉二十六日入桂林界有大華表跨官道榜曰廣南西路家人子舉頭驚詫以爲何爲至此也然自湖南盡處赤土小山綿延無已至湘山雖佳然村落蹊隧猶嫌狹少夷坦甫入桂林界平野豁開兩傍各數里石峰森峭羅列左右如排衙引而南

同行皆動心駭目相與指似夸歎又謂來遊之晚夾道高楓古柳道塗大達如安肅故疆及燕山外城都會所有自不凡也泊大通驛道上時見鮮血之點凝漬可惡意謂割羊豕者昇過所滴然亦惟何其多也忽悟此必食檳榔者所唾徐究之果然二十七日眎經畧安撫使印自此趨府二十七里至安興縣十七里入巖關兩山之間僅容車馬所以限嶺南北相傳過關卽少

雪有瘴二十三里過秦城築五嶺之戍疑此地是二十八日至滑石舖嶺中有龍思泉又曰碧玉泉小亭對之張安國題詩曰煩君淨洗南來眼從此山川勝北州即知桂林巖壑必稱所聞矣二十二里至靈州縣秦史祿所穿靈渠在焉縣以此名六十里至八桂堂桂林北城外之別圃也未至八桂二三里間有小坡橫道高丈餘上有石碑曰桂嶺其實非也桂嶺聞在賀州各

始安嶺彼州又有桂嶺縣今桂林所治乃零陵地舊屬荊州北自中原來南者久不行賀州嶺路但取道於此故事帥守監司過嶺卽有任子恩纔越此坡小卽沾賞前帥呂源者立碑坡下數年盡廢賞輿而碑猶存泊八桂堂十日三月十日入城交府事郡治前後萬峰環列與天無際按桂林自唐以來山川以秀稱韓文公雖不到然在潮乃熟聞之故詩有參天帶水翠羽黃

甘之語未句乃曰遠勝登仙去飛鸞不暇駮蓋
歆艷之如此故余行紀以駮鸞名之若其風土
之詳則有桂海虞衡志焉



國家圖書館, NATIONAL CENTRAL LIBRARY, TAIWAN, R.O.C.